

# O'th flaen, O Dduw, rwy'n dyfod

## Caneuon Ffydd: Rhif 175

---

---

O'th flaen, O Dduw, rwy'n dyfod  
gan sefyll o hir-bell;  
pechadur yw fy enw,  
ni feddaf enw gwell;  
trugaredd 'rwy'n ei cheisio,  
a'i cheisio eto wnaf,  
trugaredd imi dyro,  
'rwy'n marw onis caf.

Pechadur wyf, mi welaf,  
O Dduw, na allaf ddim;  
'rwy'n dlawd, 'rwy'n frwnt, 'rwy'n euog,  
O bydd drugarog im;  
'rwy'n addef nad oes gennyf,  
drwy 'mywyd hyd fy medd,  
o hyd ond gweiddi, "Pechais!"  
Nid wyf yn haeddu hedd.

Mi glywais gynt fod Iesu,  
a'i fod ef felly nawr,  
yn derbyn publicanod  
a phechaduriaid mawr;  
O derbyn, Arglwydd, derbyn  
fi hefyd gyda hwy,  
a maddau'r holl anwiredd  
heb gofio'r camwedd mwy.

THOMAS WILLIAM, 1761–1844

### MYFYRDOD

Sylfaenodd Thomas William, Bethesda'r Fro, ei emynau i gyd o'r bron ar gymalau o adnodau, ac nid yw hwn yn eithriad. Fe adleisia hanes yr Israeliaid a phrofiad Paul hefyd pan ddywed hwnnw: 'Daeth Crist Iesu i'r byd i achub pechaduriaid. A minnau yw'r blaenaf ohonynt. Ond cefais drugaredd . . . (1Tim. 1:13).' Er ei fod yn ei weld fel crefftwr mwy ymwybodol na Phantycelyn ac unrhyw un o'r emynwyr cynnar, fe dalodd Syr Thomas Parry yn ei gyfrol

*Hanes Llenyddiaeth Gymraeg Hyd 1900* deyrnged uchel i Thomas William ac i'r emyn hwn yn arbennig am ei natur delynegol a'i gywirdeb mynegiant: 'Yr oedd Thomas William yn fardd rhagorol iawn, a phrin fod yr un emyn Cymraeg mwy diffuant ei deimlad na mwy dilyn ei fynegiant na "O'th flaen, O Dduw, 'rwy'n dyfod". Y mae i'r emyn hwn holl deimladrwydd a rhesymeg farddonol telyneg.'

Ceir ymateb dyn a Duw i ofn yn yr emyn hwn. Ofn yn aml sy'n peri ein bod yn gosod pellter rhyngom a phobl neu bethau eraill. Roedd gan yr Israeliaid ofn am eu bywydau wrth droed mynydd Sinai yn yr anialwch, pan welsant hwnnw'n mygu i gyd: 'Pan welodd yr holl bobl y taranau a'r mellt, yr utgorn yn seinio a'r mynydd yn mygu, safasant o hirbell' (Ex. 20:18). 'Peidiwch ag ofni' yw ymateb Moses i ddychryn y bobl wrth iddo gamu'n eofn i mewn i'r tywyllwch: 'Safodd y bobl o bell, ond nesaodd Moses at y tywyllwch lle'r oedd Duw' (Ex. 20:21). Mae'r Beibl yn dweud wrthym ni mor aml am beidio ag ofni, yn wir fe gyfrifir ei fod yn dweud hynny wrthym 365 o weithiau – un ar gyfer pob dydd o'r flwyddyn.

Ofn ymateb Duw iddo mae Thomas William. Ond yn fwy na hynny, ymateb Duw i'w bechod. Mae'r Beibl yn nodi'n glir beth yw ymateb Duw i ddrygioni: 'Oherwydd nid wyt Dduw sy'n hoffi drygioni, ni chaiff y drwg aros gyda thi' (Salm 5:4); 'Ti sydd â'th lygaid yn rhy bur i edrych ar ddrwg, ac na elli oddef camwri' a ddywed Habacuc wrth Dduw pan mae'n ei atgoffa y dylai wneud rhywbeth ynglŷn â'r rhai drygionus sydd o'i gwmpas! (Hab.1:13) Mae'r ofn yma o ymateb Duw i bechod yn peri mai 'o hir-bell' mae'r emynydd yn sefyll, gan apelio yn unig at drugaredd Duw a chofio, yn wyneb ei bryder a'i ofn, fod Iesu 'yn derbyn publicanod a phechaduriaid mawr'. Mae'n galw'r rhai isaf eu stad i droi oddi wrth eu drygioni, i ddod ato ac i ddibynnu arno. Ni fydd y rhain yn sefyll o hir-bell mwyach, ond mwynhau cymdeithas felys ac agos at Dduw yng Nghrist. 'Ond yn awr, yng Nghrist Iesu, yr ydych chiwi a fu unwaith ymhell, wedi eich dwyn yn agos trwy waed Crist' (Eff. 2:13).

## **GWEDDI**

O Dad nefol, diolchaf i ti fod cariad yn bwrw allan bob ofn, ac nad oes raid imi 'sefyll o hir-bell' mwyach. Daeth Iesu â ni yn agos atat. Diolch iti am un sy'n maddau pob pechod a bai. Yn ei haeddiant ef yn unig y mae imi dderbyniad atat. Amen.